

Suliffissaaleqisunik sulilersitsiniarneq pillugu Inatsisartut peqqussutaat

Suliassaqartitsiniarnermik inunnillu isumaginninnermik Kalaallit Nunaannut inatsit nr. 580, 29. november 1978-imeersumi § 2 naapertorlugu makku aalajangersarneqarput:

Siunertaa atorineqarfissaalu

§ 1. Inatsisartut peqqussutaata siunertaraa kommunimi suliffissaaleqisoqaleriataartarnera oqilisaaviginiarlugu kommunit sulilersitsiniarnermut suliniuteqarnissaannik periarfissinnissaat, aamma kommunimi suliffissaaleqisut sulisinneqarnissaannut periarfissat pitsanngorsarnissaat.

Imm. 2. Sulilersitsiniarnermut suliniutit makkuusinnaapput:

- 1) suliffissaaleqisup ilinniagaqarnissaannik tassunga ilanngullugu ilinniaqqinnissaannik, tak. § 2 imaluunniit
- 2) suliffissaaleqisup kommunip sulilersitsiniutaani sulisinneqarnissaannik neqerooruteqarneq, tak. § 4.

Ilinniagaqarnissamik neqeroorutit

§ 2. Ilinniagaqarnissamik neqerooruteqarnikkut suliffissaaleqisup sulilersinniarneqarnissaannik kommunalbestyrelsi aalajangiisinnaavoq, tassunga ilaalluni ilinniaqqinnissamik neqerooruteqarneq.

Imm. 2. Inatsisartut peqqussutaanni matumani malittarisassat malillugit ilinniartitaanermini pikkorissarnernilu sorlarni peqataasoqarsinnaanersoq, aammalu suliffissaaleqisup ilinniakkamut pikkorissarnermulluunniit peqataanissaanut piumasaqaatit pillugit Naalakkersuisut aalajangersaassapput.

§ 3. Suliffissaaleqisoq ilinniarnerni pikkorissarnerniluunniit ilinniakkamut pineqartumut tapiissutaasartut aalajangersagaareersut annertoqataannik ilinniagaqarnermi ikiorsiissutisisinnaatitaassaaq, taamatuttaaq ilinniagaqarnermi ikiorsiissutit tunniunneqartassapput tamatumunnga pineqartumut maleruagassat pioreersut naapertorlugit.

Imm. 2. Ilinniartitaaneq pikkorissarnerniluunniit inatsisit allat naapertorlugit tapiiffigineqarsinnaatitaanngippat, suliffissaaleqisoq ilinniagaqarnermi ikiorsiissutisisinnaatitaassaaq, ilinniartitaanermi assingusumi pikkorissarnermiluunniit assingusumi malittarisassat atuuttut naapertorlugit tapiissutisisinnaatitaanermut assingusumik annertussusilinnik.

Kommunit sulilersitsiniutaannik pilersitsinermini ingerlatsinermilu piumasaqaatit

§ 4. Peqqussummi matumani malittarisassat tunngavigalugit kommunalbestyrelsi aalajangiisinnaavoq kommunip sulilersitsiniutai aqqutigalugit suliffissaaleqisut sulilersinneqassasut.

Imm. 2. Kommunit sulilersitsiniutai paasineqassapput tassaasut suliniutit kommunimit ataatsimit kommuninilluunniit arlalinnit ataatsimoorullugit pilersinneqarlutillu ingerlanneqartut aningaasalersorneqartullu.

§ 5. Kommunalbestyrelsi pisussaavoq sulilersitsiniutini piunasaqaatit nalinginnaasut makku naammassineqarsimanissaat qulakkiissallugu:

1) Sulilersitsiniutip aallartinneqannginnerani pilersaarummut nalunaarsuut saqqummiunneqarsimassaaq minnerpaamik makkuninnga imaqtartussaq:

- a) sulilersitsiniutip siunertaa
- b) sulilersitsiniummi suliassat
- c) sulilersitsiniutip siulersorneqarnera
- d) siunniussat kikkuuneri
- e) peqataasussat qassiussusissaat
- f) sulilersitsiniutip atuunnissaata sivissusissaa aamma
- g) sulilersitsiniummut aningaasatigut missingersuusi

2) Sulilersitsiniummut qullersaasunik aqutsisoqassaaq aammalu sulilersitsiniut ulluinnarni aqutsisoqassalluni.

3) Sulilersitsiniummik aqutsisut nalilersuiunissaat qulakkeerneqarsimassaaq, taamatuttaarlu sulilersitsiniummik nakkutilliisuussallutik.

§ 6. Sulilersitsiniutit aallartinneqarnissaat sioqqullugit sulineramik inuussutissarsiuteqartut kattuffii aamma sulisitsisut kattuffii pissutsinut §§ 7-8-mi aamma §§ 11-13-imi taaneqartunut oqaaseqaateqarnissaannik kommunalbestyrelsip periarfississavai.

§ 7. Sulilersitsiniutinik pilersitsinerup ingerlatsinerullu suliffeqarfinni pioreersuni nioqqutis-sat sullissinerillu pioreersut ingerlanneqareersulluunniit piunaneqarneri annikinnerulersissanngilai.

Imm. 2. Sulilersitsiniutinik pilersitsinerup ingerlatsinerullu atorfiit sulilersitsiniummi suliassanut attuumassuteqartut ikinnerulersissanngilai.

Imm. 3. Sulilersitsiniutinik pilersitsinerup ingerlatsinerullu inuussutissarsiutitigut ilinniartitaanerni ilinniartut sulineramik sungiusarfigisinnaasaat ikinnerulersissanngilai.

§ 8. Sulilersitsiniutit taamaallaat tunisassiorsinnaallutillu nioqqutissanik tuniniaasinnaapput niuernermini atugassarititaasut atuuttut malillugit, matumani sulianut taamaattunut tunngasut tuniniarneqartarnerini akigitinneqartuni nalinginnaasumik iluanaarutissatut naatsorsuutigineqartartoq ilanngutereerlugu.

Akissarsiat atorfinitsitaanermilu atugassarititaasut

§ 9. Sulilersitsiniummi sulilersitsoqassaaq aatsaat suliffissaaleqisup peqqissutsimigut inuttulluunniit atukkamigut allatigut atugaasa tamanna akornutissaqartinngippassuk.

§ 10. Sulilersitsiniutini inatsisartut peqqussutaat manna naapertorlugu sulisut sulisinneqarnerup ingerlanerani suliffissarsiortutut nalunaarsimassapput. Tamannali atuutinnigilaq sulilersitsiniummi ilinniagaqarneq ingerlanneqarpat.

§ 11. Sulisoq akissarsiaqartinneqassaaq ilinniagaqarsimanngitsutut nalunaaquttap akunnermusiat minnerpaaffiat qaqugukkulluunnit atuuttoq naapertorlugu, tak. SIK-p Naalakkersuisullu sulisunut ilinniagaqarsimasunut ilinniagaqarsimanngitsunullu nalunaaquttap akunnermusialinnut isumaqatigiissutaat.

Imm. 2. Akissarsiat ullut 14-ikkaarlugit kingumoortumik tunniunneqartassapput, sulisullu nalunaaquttap akunneri suliffigisimasai tunngavigalugit naatsorsorneqartassallutik.

Imm. 3. Sulilersitsiniut ilinniagaqarnermik ilaqarpat tassunga atatillugu sulisoq akissarsiaqartinneqassaaq § 3-mi malittarisassat naapertorlugit.

§ 12. Sapaatip akunneranut suliffissaq agguaqatigiissillugu annerpaamik nalunaaquttap akunnerinik 40-nik sivikinnerpaamilli nalunaaquttap akunnerinik 20-nik sivilussuseqassaaq.

§ 13. Atorfinititaanermi atugassarititaasut sulianut assigusunut isumaqatigiissutini atugassarititaasut aalajangersarneqarsimasut assigissavaat, pineqartunulli isumaqatigiissuteqanngippat atorfinititaanermi atugassarititaasut sulianut assigusunut nalinginnaasumik atugassarititaasartut assigissavaat.

Aqutsineq

§ 14. Inatsisartut peqqussutaata matuma aqunneqarneranut kommunalbestyrelsi akisussaavoq.

Imm. 2. Kommunit aqutsinerminnut atatillugu suliffissaarusimasut inatsisartut peqqussutaat tunngavigalugu sulilersinneqartut tamaasa kisitsisitigit takussutissiortassavaat.

Imm. 3. Naalakkersuisut nalunaarusianut piffissalersuisinnaatitaapput kiisalu ilusissaa imarisartagassaalu pillugit erseqqinnerusumik malittarisassanik aalajangersaasinnaallutik.

§ 15. Kommunalbestyrelsi pisussaavoq suliffissaaleqisut peqqussummi matumani malittarisassat tunngavigalugit sulilersinneqartut sulilersinneqalinnginnerminnut naleqqiullugu aningaasatigit atukkaminnt ajornerusumik atugaqalinnginnissat qulakkiissallugu.

Aningaasalersorneqarnera

§ 16. Inatsisartut peqqussutaat manna malillugu aningaasartuutit kommuninit aningaasartuutigineqassapput, taamaattorli tak. § 3, imm. 1.

Atortussanngortitsineq

§ 17. Inatsisartut peqqussutaat manna 1. januar 2002 aallarnerfigalugu atortuulersinneqarpoq.

Imm. 2. Tamatumunnga peqatigitillugu suliffissaaleqisunik sulisitsiniarneq pillugu Inatsisartut peqqussutaat nr. 9, 3. november 1994-imeersoq atorunnaarsinneqarpoq.

Imm. 3. Inuit inatsisartut peqqussutaat imm. 2-mi taaneqartoq malillugu 31. december 2001-imi

sulilersinneqarsimasut sulilersinneqarnertik naammassisinnaavaat aalajangersakkat siusinnerusukkut
atuuttut naapertorlugit.

Namminersornerullutik Oqartussat, ulloq 12. november 2001.

Jonathan Motzfeldt

/

Ole Dorph

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut